

Dictes-moy où, n'en quel pays,
 Est Flora, la belle Romaine;
 Archipiada, ne Thais,
 Qui fut sa cousine germaine;
 Echo, parlant quand bruyt on uaine
 Dessus rivière ou sus estan,
 Qui beauté est trop plus qu'humaine?
 Mais où sont les neiges d'autan!

Où est la très sage Heloïs,
 Pour qui fut chastre et puis moine
 Pierre Esbailart à Saint-Denis?
 Pour son amour eut cest esoyne.
 Semblablement, où est la royne
 Qui commanda que Buridan
 Fust gecté en ung sac en Seine?
 Mais où sont les neiges d'autan!

La royne Blanche comme ung lys,
 Qui chantoit à voix de seraine,
 Berthe au grand pied, Bietris, Allys;
 Harenbourgis, qui tint le Mayne,
 Et Jehanne, la bonne Lorraine,
 Qu'Anglois brulèrent à Rouen;
 Où sont-ils, vierge souveraine?...
 Mais où sont les neiges d'autan!

Prince, n'enquerez de sepmaine
 Où elles sont, ne de cest an,
 Que ce refrain ne vous remaine:
 Mais où sont les neiges d'autan!



Poème de François Villon

Musique Georges Brasseur.